

四庫全書

子部

欽定四庫全書

古今攷卷二十二

元方回續

故項籍臣稱其主名者盡拜為大夫鄭君不從逐之

呂東萊曰按鄭當時傳其先鄭君嘗事項籍籍死而屬漢高祖令諸故項籍臣名籍鄭君獨不奉詔詔盡拜名籍者為大夫而逐鄭君鄭君死孝文時高帝之怨項籍

可謂甚矣惡其姓而使其宗族改之賤其名而迫其故
臣名之雖恢廓大度及困厄不可消釋徧忿乃如此然
則天資豈可恃哉 紫陽方氏曰古之人有逃名避難
變姓名如范蠡之陶朱公范睢之張祿者有如智果之
為輔氏伍子胥之子為齊氏者漢高不誅項氏族屬賢
矣而使項伯等姓為劉氏使項籍之臣皆名籍以忤忍
之心為戲弄之舉百世之下范唐鑑呂成公得以筆誅
之人主豈可不謹哉

還至定陶馳入齊王信壁奪其軍徙信為楚王

漢書韓信傳漢王之敗固陵用張良計徵信將兵會垓

下項羽死高祖襲奪信軍徙信為楚王史記淮陰侯傳

漢王之困固陵用張良計召齊王信遂將兵會垓下項

羽已破高祖襲奪齊王軍

徐廣曰以齊為平原十乘東萊齊郡

漢五年正

月徙齊王信為楚王都下邳史記高祖本紀葬羽穀城

還至定陶馳入齊王壁奪其軍正月漢王為皇帝

云

皇帝曰義帝無後齊王韓信習楚風俗徙為楚王都下

邳漢書高帝紀於奪齊王信軍之後書共敖子尉事乃
上書春正月追尊兄伯武哀侯而書下令曰楚地已定
義帝無後欲存卹楚衆以定其主齊王信習楚風俗更
立為楚王王淮北都下邳讀紀表志傳之文一事必三
四處書之奪韓王信改王楚一事史記漢書紀傳四處
檢校皆微不同蓋襲奪信軍之時在漢五年冬十二月
改王楚之時在春正月漢依秦以十月為歲首也史記
書即皇帝位在信改王楚之先漢書書即皇帝位在信

改王楚之後今按漢紀書諸侯上疏請即皇帝位凡七
異姓王楚王韓信為首知即位汜水二月甲午也奪軍
十二月也改王正月也按信之得罪於高皇帝假王之
請實自王帝憤之一也固陵之會

即今光
州固始

許地乃至帝

憤之二也武涉蒯通二人之說帝尚未知也奪軍者帝
之憤不可遏矣改王者猶不欲食言其實不得已也然
而猶善為辭曰義帝無後曰齊王信習楚風俗漢謀臣
有人哉武涉蒯通之說司馬遷何從得之其文章縱橫

甚妙

以彭越為梁王

五年春正月

徙漢信為楚王以彭越為梁王都定陶紫陽方氏曰

漢五年冬十月漢王追項羽至陽夏

今亳州陽夏縣

止軍與齊

王信魏相國越期會擊楚至固陵不會用張良計許越

睢陽以北至穀城之地王之於是與韓信皆引兵來滅

羽垓下

沛汶縣聚邑名汶衛交反

高祖挾不會之怨久矣正月信越

之王不食言不得已而已人臣事君而觀望徼利彭越

無識何足道韓信亦為之乎

黥布之王

立布為淮南王 紫陽方氏曰隨何使九江英布叛楚
歸漢漢二年夏四月彭城之敗之後也以故九江王從
漢王擊楚四年秋七月立布為淮南王漢書高紀布傳
史記布傳並同惟史記高紀於大會垓下之後書立武
王布為淮南王此一句未可曉漢書高紀不書大會垓
下但於五年書曰十二月圍羽垓下史記高紀書大會

垓下在四年徐廣注曰七月此亦不可曉

赦天下殊死以下

又下令曰兵不得休八年萬民與苦甚今天下事畢其赦天下殊死以下韋昭曰殊死斬刑也師古曰殊絕也異也言其身首離絕而異處也紫陽方氏曰二年六月立孝惠為太子史記書大赦罪人漢紀書立太子赦罪人此赦史記不書其曰兵不得休八年萬民與苦甚不以得天下為誇不急於即皇帝位而發此語辭簡意

惻後世下一赦多為儷語不近人情曷不法此八年者
秦二世元年壬辰秋七月陳勝起蕲二年癸巳三年甲
午九月二世弑子嬰立四十六日秦亡高祖元年乙未
丙申丁酉戊戌巳亥五年十二月誅項羽凡八年也此
高祖第二赦也其先書曰大赦罪人境內而已今書赦
天下文法自不同而又知古不數赦凡赦非常之恩也
二月甲午即皇帝位于汜水之陽

漢書本紀書楚王韓信韓王信淮南王英布梁王彭越

故衡山王吳芮趙王張敖燕王臧荼昧死再拜言大王

陛下先時秦為亡道天下誅之大王先得秦王

此一句文章闕

組見高祖功第一

定關中於天下功最多存亡定危救敗繼絕

好八字

以安萬民功盛德厚而位號比擬亡上下之分大

王功德之著於後世不宣昧死再拜上皇帝尊號

辭意甚美

漢王曰

云

諸王固請於是諸侯王及太尉長安侯臣

綰等三百人與博士掾嗣君叔孫通謹擇良日二月甲

午上尊號漢王即皇帝位于汜水之陽

史記注蔡邕曰上古天子稱皇其次稱帝其次稱王秦乘三王之末為漢驅除自以德兼三皇五帝故併以為號漢高祖受命功德宜之因而不改

史記秦始皇本紀二十六年秦初併天下令丞相御史

曰云云坐六王罪狀乃云寡人以眇眇之身興兵誅暴

亂賴宗廟之靈六王咸伏其辜天下大定今名號不更

無以稱成功傳後世其議帝號丞相注姓王御史大夫

劫注姓馮御史大夫秦官廷尉斯等注廷尉秦官聽獄必質諸朝廷與眾

共之兵獄同制故稱廷尉

皆曰昔者五帝地方千里其外侯服夷服

諸侯或朝或否天子不能制今陛下興義兵誅殘賊平

定天下海內為郡縣法令由一統自上古以來未嘗有

五帝所不及臣等謹與博士議

注博士秦官掌通古今

曰古有天

皇有地皇有泰皇泰最貴

索隱注泰皇人皇也蓋三皇以前稱泰皇一云泰皇太昊

也臣等昧死上尊號王為泰皇命為制令為詔天子自

稱曰朕王曰去泰著皇采上古帝位號號曰皇帝他如

議制曰可

呂東萊大事記注引致堂胡氏曰古之聖人應時稱號故曰皇曰帝曰王而止矣非帝貶於皇王貶於帝也惟不知此義遂以皇帝為首稱而以自居以王為降等而以封其臣子失之甚矣王之為名繼天撫世之謂也曾是而可使臣子稱之曰吳楚僭王春秋比之夷狄六國用夷禮乃周公之所膺也豈可以此之故謂王卑於帝而不稱哉仲尼祖述唐虞憲章三代尊周立號繫王於天其禮隆極於秦何取焉有天下者必法孔子稱天王

其列爵諸侯自公而降則名正言順百世以俟而不惑矣

呂東萊大事記注曰張晏曰汜水在濟陰界晏敷劍反按地志云高祖即位壇在曹州濟陰縣界漢書地理志定陶屬濟陰郡今興仁府濟陰縣紫陽方氏曰呂東萊大事記書漢王即皇帝位取胡待制寅讀史管見一段注為小字蓋謂自秦漢以來有天下者稱皇帝至今不可改矣存致堂之說古之經也當孝廟時著此書必

欲時君從致堂之說則不可行或以此請目為狂怪必
矣從時達變今之權也大事記刊本誤以趙王張敖為
張耳耳死矣不見漢王誅項羽也

附天皇地皇泰皇十紀攷

方叔機
附見

紫陽方氏曰索隱注泰皇人皇也三皇以前稱泰皇易
繫辭言伏羲神農黃帝世所謂三皇者指此故康節皇
極經世書謂易始三皇書始二帝詩言三王春秋言五
霸分而為四上古之天皇地皇人皇無人言及劉恕通

鑑外紀細字注開闢至獲麟二百七十六萬歲分為十紀大率一紀二十七萬六千年十紀者九頭紀五龍紀攝提紀合洛紀連通紀序命紀此下見鄭玄六藝論之名中有吾家方叔機注回生晚不見此書此後循蜚紀因提紀禪通紀疏訖紀或云疏訖此十紀也此下始說盤古盤古之下始說天皇氏地皇氏人皇氏然後說有巢氏燧人氏而伏羲氏女媧氏而又有大庭柏皇中央栗陸驪連赫胥尊盧混沌皞英有巢

又是一有巢氏非
天地人皇之後有

巢氏朱襄陰康無懷氏博采異書居多怪說茲不詳錄回

別攷之初學記乃唐徐堅所纂又在道原三百年前有
項峻始學篇曰天皇十三頭號曰天靈治萬八千歲地
皇十一頭治八千歲人皇九頭兄弟各三百歲依山川
地勢度為九州各居一方有遁甲開山頭之說有洞冥
記之說謂天皇一姓十三人有徐整三五歷記之說有
春秋緯之說有帝系譜之說其他雜書不一唐之書至
宋南渡多亡矣回不得皆見然天地人皇十紀諸氏不

可得而攷存疑可也

昧死再拜自秦始

漢書張晏注曰秦以為人臣上書當言昧死死罪而言漢遂遵之 紫陽方氏曰昧死死罪今人不用秦人臣上人主猶曰再拜近世乃動曰百拜可憐哉

命為制令為詔自秦始

記秦始皇紀命為制令為詔注蔡邕曰制書帝者制度之命也其文曰制詔詔書詔告也 紫陽方氏曰尚書

訓誥誓命此命之始也書發號施令令出惟行弗惟反
令者命之異名古上下通稱一國一家皆有君命父命
而軍中惟知有將軍之令後世一監司太守縣令皆有
令字旗秦改命為制令為詔則以上諭下之文人主獨
稱制詔而人臣不敢稱後世有律令之令有制曰有詔
曰有內制掌宰相以上除拜誥詞及詔書敕文德音批
答不一外制專掌執政以下誥命誥亦曰告魏晉以來
親王臨民曰教下達上之文其名甚夥上諭下之文亦

不能卒書按漢五年春正月徙王韓信書下令曰未即
帝位也追尊昭靈夫人之下始書詔曰既即帝位用秦
法也

天子自稱曰朕自秦始

事已見前注蔡邕曰朕我也古者上下共稱之貴賤不
嫌則可以同號之義也臯陶與舜言朕言惠可底行屈
原曰朕皇考至秦然後天子獨以為稱至漢不改紫
陽方氏曰予讀呂居仁詩有云乃知鑠頭通已勝狗脚

朕下一句出北史上一句出傳燈錄世傳饅頭通禪師
為魏孝靜帝之後身皆邪說也秦之稱朕亦何所益趙
高愚二世曰天子稱朕固不聞聲於是二世常居禁中
與高決諸事公卿希得朝見豈不悖哉索隱曰臣下屬
望纔有兆朕聞其聲耳不見其形也一字之禍乃至於
此

制曰可自秦始

始皇不從秦皇之請自為皇帝他如議制曰可注蔡邕

曰羣臣有所奏請尚書令奏之下有司曰制天子答之曰可 紫陽方氏曰二典都兪吁咈此古君臣相可否之稱也秦始以天子之命為制當時秦皇帝口可之而史官書制曰二字也下文制曰除謚法制曰二字亦史官所書也三十四年丞相李斯請焚書制曰可嗚呼此所謂大不可者而可之哀哉近世臣僚奏劄曰奉聖旨依辭免則奉聖旨不允或加三省同奉聖旨依或大事御筆依大臣辭免或御筆降詔不允御筆或儷語連篇

出於私人之代言如朱熠之徒文多不佳識者竊嘆不知人君之大體矣

附曲禮天子稱謂攷

曲禮下君天下曰天子朝諸侯分職授政任功曰予一人踐阼臨祭祀內事曰孝王某外事曰嗣王某臨諸侯畛於鬼神曰有天王某甫 天子未除喪曰予小子生名之死亦名之 鄭玄注天子予一人皆擯者辭天子謂外及四海也今漢於蠻夷稱天子於王侯稱皇帝覲

禮曰伯父實來余一人嘉之余古予字 注孝王某嗣

王某皆祝辭也唯宗廟稱孝天地社稷祀之郊內而曰

嗣王不敢曰外內 注天王某甫畛致也祝告致于鬼

神辭也曰有天王某甫且字也不名者不親往周禮大會

同過山川則太祝用事鬼神謂百辟卿士 注予小子

謙未敢稱一人春秋傳曰以諸侯之踰年即位亦知天

子之踰年即位以天子三年然後稱王亦知諸侯於其

封內三年稱子 注生名之死亦名之生名之曰小子

王死亦曰小子王也晉有小子侯是僭取於天子號也
紫陽方氏曰曲禮漢儒所撰不書秦漢皇帝稱朕事
存古也鄭玄以漢事注三禮先儒病之然其引漢於蠻
夷稱天子於王侯稱皇帝則有據漢文帝細柳之幸曰
皇帝敬勞將軍成禮而去武帝在位之三十一元封
元年北登單于臺至朔方臨北河勒兵十八萬騎遣使
者告匈奴曰單于能戰天子自將待邊不能亟來臣服
如鄭玄言天子未除喪曰予小子書成王顧命康王自

稱曰眇眇予末小子然康王之誥曰惟予一人釗報誥
乃不曰予小子何也豈以予小子稱於宗廟先王之前
而待其羣臣則稱予一人耶踰年即位有之二年後稱
王別攷

尊王后曰皇后

白虎通曰天子之配謂之后后者君也天子之配至尊
故謂后也按夏殷已前后妃之制其文畧矣大率皆稱
妃故黃帝有四妃帝嚳四妃

正嫡曰元妃以下稱次妃
又有禹妃湯妃皆是也並

出史記周則天子立后正嫡曰王后秦稱皇帝正嫡曰皇

后漢因之帝祖母稱太皇太后母稱皇太后魏晉之後
母后之號並遵秦漢紫陽方氏曰成王顧命曰皇后
馮玉几導揚末命即皇后字本是天子之稱曲禮曰天
子之妃曰后諸侯曰夫人秦稱王之後周天王未亡不
見秦王后之文孝文王之為太子有正夫人曰華陽夫
人子楚母曰夏姬秦昭王五十六年卒孝文王以安國
君立為王以華陽夫人為王后此秦稱王后之始也孝

文王卒子楚立是為莊襄王稱養母為華陽太后尊母
夏姬為夏太后此秦稱太后而又並后之始也子楚之
在邯鄲納呂不韋有孕之妾是為始皇帝母史記終不
見其姓故天下稱始皇為呂政而其母趙氏既寡與呂
不韋淫不韋又進大陰人嫪毐為始皇母日夜淫嫪毐
伏誅不韋飲鸚始皇殺母之淫嫪可也殺不韋乃殺所
生父矣又遷母太后於雍以茅焦之說始迎還咸陽呂
不韋傳書始皇十九年太后薨謚為帝太后是時始皇

未併天下未稱皇帝故其母無皇太后之稱索隱注謂
秦不用謚法始皇稱皇帝之後故其母號為帝太后非
誅列生時之行然始皇之后史不見為何人何姓長子
扶蘇幼子胡亥不知其母為誰始皇死時胡亥猶稱公
子無爵位李斯趙高詐為遺詔立為太子二世立殺六
公子其一名曰將閭當時扶蘇諸弟胡亥諸兄亦不聞
其母為誰李斯傳始皇有二十餘子注云辨士隱姓名
遺章邯書曰李斯為秦王死廢十七兄而立今王也裴

駟謂二世是秦始皇第十八子此書在善文中未詳然則始皇不立太子為其子者皆匹夫稱公子而已無尺土之封無一命之爵二十餘子皆不見其母為誰李斯傳又云公子十二人僇死咸陽市十六主斃死社斃音翟與又公子高上書請死胡亥可書賜錢十萬以葬皆不同見諸公子公主之母始皇男女三十餘人皆屠戮無孑遺哀哉

太子曰皇太子

韓詩外傳曰五帝官天下三王家天下家以傳子官以傳賢故自唐虞以上經傳無太子稱號夏殷之王雖則傳嗣其文畧矣至周始見文王世子之制白虎通曰何以知天子之子稱世子春秋傳曰王世子會于首止是也何以知天子之子稱太子尚書曰太子發升于舟是也


回曰此偽泰誓也

或云諸侯之子稱世子則春秋傳云晉有

太子申生鄭有太子華齊有太子光由是觀之周制天子世子亦不定也漢制天子稱皇帝其嫡嗣稱皇太子

諸侯王之嫡稱世子後代咸因之 紫陽方氏曰秦始皇稱皇帝之後不立太子史記書長子扶蘇長子即太子也古者嚴嫡庶之分春秋公羊傳天子一娶十二女三國來媵媵以娣姪諸侯一娶九女二國來媵雖未可盡信而春秋經有來媵之文天子諸侯不再娶后死夫人死以娣姪之媵者主後宮事惟后夫人所生之嫡長子即是太子世子為天子者無後世所謂初生子稱長子次封公次封王無冊立皇太子之制後世不分嫡庶

惟人主愛憎必愛也然後自皇子立為太子冊立之禮
甚盛非古也高帝初為漢王彭城之敗皇太子呂后皆
為項王所得馬上危急屢欲棄孝惠帝矣賴夏侯嬰以
完二年六月漢王還櫟陽壬午立太子令諸侯子在關
中者悉集櫟陽為衛時惠帝始六歲耳



古今攷卷二十二

欽定四庫全書

子部

古今攷卷二十三

詳校官中書臣張經田

員外郎臣牛稔文覆勘

總校官進士臣楊懋珩

校對官中書臣李 奎

謄錄監生臣王 焜

欽定四庫全書

古今攷卷二十三

元方回續

置酒雒陽南宮

上曰列侯諸將無敢隱朕皆言其情吾所以有天下者
何項氏所以失天下者何高起王陵對曰云云上曰云
云此三者皆人傑也史記紀同惟高祖曰異紫陽方
氏曰漢書注高起二字張晏以為高官者起或以為姓

高名起史記注有都武侯臣起此當缺疑不足深辨三
傑之說夫人所知亦無庸議 呂東萊曰臯陶之陳謨
曰在知人在安民高帝論得天下之由獨以三傑自許
而自起豐沛以來與民休息之志貫于幽明其大畧可
謂合矣史記正義曰括地志云南宮在雒州雒陽縣東
北二十六里洛陽故城中輿地志云秦時已有南北宮
以此攷之秦雖都關中猶倣周東都之制建宮闕于洛
陽高帝之西洛陽名為郡而終西京之世實以為別都

趙涉勸周亞夫出武關抵雒陽直入武庫擊鳴鼓霍光以丞相車千秋子為雒陽武庫令更始自雒陽而西初發李松奉引馬驚奔觸北宮鐵柱門光武降朱鮪入洛陽幸南宮却非殿遂定都然則自高帝迄于王莽洛陽南北宮武庫皆未嘗廢周召卜宅之意固非後世所能喻至於天下之形勢則始皇李斯高祖張良蓋深識之矣

田橫自殺

班固紀書曰初田橫歸彭越項羽已滅橫懼誅與賓客

亡入海上恐其久為亂遣使者赦橫曰橫來大者王小

者侯

師古曰大者謂其長率即橫身也小者其徒屬也

不來且發兵加誅橫懼

乘傳詣洛陽未至三十里自殺史記高帝紀不書 呂

東萊大事記書曰彭越既受漢封橫入海居島中高帝

遣使召之詔衛尉鄼商曰齊王橫即至人馬從者敢動

搖者致族夷橫至尸鄉廐置自刎此東萊節史記田儼

傳文而改以彭越為梁王一句為彭越既受漢封此前

輩叙事不妨改史語一例也 橫謂其客曰橫始與漢

王俱南面稱孤今漢王為天子而橫乃為亡虜而北面
事之其耻固已甚矣回謂此語不可不書 致堂胡氏
曰橫不肯北面漢祖以同列為王之故志亦壯矣然天
下豈有俱王俱帝之理豈有四海無君之道呂政之時
藏器以待可也胡亥之時合從而起可也至漢祖出可
以委質矣漢祖而不可事則誰可事者此所謂可以無
死死傷勇者也紫陽方氏曰三皇五帝三王君天下者
之號非有優劣諸侯擅王自七國始君其國者也布衣

而王自秦亡始亦君其國者也妄意男子動欲為王殺身滅族令終者鮮而後世人主為帝人臣有親王之王功臣之王無國可君世變如此

乘傳

張應反

如淳曰四馬高足為置傳四馬中足為馳傳四馬下足為乘傳一馬二馬為軺傳急者乘一乘傳師古曰傳者若今之驛古者以車謂之傳車其後又單置馬謂之驛騎陳祥道禮書周禮行人掌邦國傳遽之小事爾雅曰

遽傳也春秋之時楚子乘驛伐庸

文十六年

晉人以傳召伯

宗

咸五年

鄭商人弦高使遽告于鄭

僖二十三年

皆傳車也郭

璞曰傳車驛馬之名

紫陽方氏曰禮記前有車騎疏

謂古人不單騎馬左傳以公乘馬而歸恐騎自此始春秋之末也戰國則蘇秦所謂騎萬匹史記趙武靈王胡服而騎射皆世變也古者傳用車馬後世驛騎單用馬亦世變也

附論廐置

史記贊曰廐置謂置馬以傳驛也田橫乘傳四馬下足之車漢初猶用車騎

附論驂乘

漢文帝令宋昌驂乘張武等六人乘六乘傳詣長安師古曰乘車之法尊者居左御者居中又有一人處車之右以備傾側是以戎事稱車右其餘則曰驂乘驂三也蓋取三人為名義耳張晏曰傳車六乘也紫陽方氏

曰文帝之詣長安以宋昌驂乘

如則文帝一車有三人

又張武等六人乘傳車六乘共為車七乘一行二十一

人二十八馬也

車戰之法車中三人
步卒七十二人別攻

附論詔衛尉酈商 中衛兵 執金吾

東萊大事記曰是時兵皆罷歸家唯屯衛在洛陽衛尉
掌宮門衛屯兵 紫陽方氏曰高祖都洛陽時他無軍
在焉太尉盧綰亦無軍可將惟酈商以酈食其之弟適
為衛尉掌宮門屯衛兵恐其挾朝廷之兵為兄報讐故
詔敢動搖者致族夷高祖西都長安亦他無軍在京師

惟有衛屯宮門之兵十一年秋七月淮南王反始發上
郡北隴西車騎巴蜀材官及中衛卒三萬人為皇太子
衛然前是帝紀不書中衛之官及卒數百官公卿表中
尉秦官掌徼循京師武帝改為執金吾中壘兩尉以至
左右京輔都尉尉丞兵卒皆屬焉如此則非用以征伐
出戰之軍也

車駕

車駕西都長安師古曰凡言車駕者謂天子乘車而行

不敢指斥也

紫陽方氏曰史記書駕入都關中不敢指斥天子以駕書以車書始此然駕又曰行史記秦始皇二十八年東行郡縣此所書行如東巡東游云耳三十一年始皇始為微行亦不過行止之義三十五年書曰行所幸有言其處者罪死于是以天子之車駕曰行或書行渡江所沈璧或書行至雲夢或書行從直道至咸陽而漢書高帝紀九年書行如雒陽武帝紀書行幸者不一又書行

自夏陽東幸汾陰行所巡無出今年算近世南渡後呼
臨安曰行都又曰行在所者此也

西都長安

東萊大事記曰婁敬建入關之策則是至言周公營洛
邑有德則易以王無德則易以亡乃戰國陋儒之說而
論周秦形勢初未嘗攷也豐鎬本文武成康之所都平
王東遷始以封秦耳敬所談秦之形勢乃周之形勢秦
漢間人多不學但據目見言之東遷以前全盛之周則

識之者鮮矣羣臣皆山東人爭言洛陽東有成臯西有
殽澠倚河鄉伊洛其國亦足恃高帝獨非山東人乎與
項羽富貴不歸故鄉之意異矣紫陽方氏曰漢高祖
西都長安史記書曰西都關中回謂長安指一城而言
關中沃壤千里以為王畿書曰關中是也回嘗讀禹貢
而有感堯都冀州兼後來幽薊營州其地極廣不如是
不足以為帝畿重內輕外以內制外之良法也其曰五
百里甸服則納總納鉅納秬納米納粟四面各五百里

共為千里皆畿甸一人之所自取自用五百里侯服則
百里采二百里男邦三百里諸侯此一侯服極有妙理
孔安國偽傳說得大謬百里采則曰侯服內之百里供
王事而已二百里男邦則曰男任也任王者事三百里
諸侯則曰三百里內同為王者斥侯故合三為一名其
訓侯服則曰侯侯也斥侯而服事曰竊謂此傳何故不
以侯為諸侯而謂之斥侯無是理也近見吾州婺源王
大監炎晦叔書解百里采者侯服五百里近甸服一百

里之內公卿大夫之采邑也二百里男邦乃公侯伯子男之男也其外三百里為諸侯則公侯伯子之國也堯舜禹河北建都三而不同千里之內無采邑四面五百里之外以一百里為采邑三百里為男邦三百里為諸侯真得強幹弱枝之道如鄭玄解王制乃謂天子之縣內方百里之國九七十里之國二十有一五十里之國六十有三以為夏制周制未聞回素所不信孟子正義引此語回嘗闢之矣以禹貢甸服侯服參攷初無此制

鄭玄妄也孔安國之傳偽也王晦叔之解乃合于天理
人心何也漢高祖定都關中西巴蜀北隴西上郡北地
未嘗以封諸侯王其王者皆在函谷關武關之東以關
西制關東猶堯舜禹以一河北冀州制河南數十百侯
服也咸建五長禹言之而禹貢侯服百里采二百里男
邦三百里諸侯足知堯舜禹畿內千里無采邑鄭玄之
徒附會王制說多舛戾不經不足信也漢關中不以封
暗合堯舜禹之制云

六月天下大赦

東萊大事記曰正月之赦為項籍滅而下也六月之赦為定都關中而赦也紫陽方氏曰漢二年正月赦罪人一赦也所及者狹巴蜀三秦及新得之郡耳五年既有天下正月六月之赦始廣青災肆赦所見舜典青過也所謂宥過無大災禍也所謂疲癯殘疾凡過失患害之人則赦之或曰目疾曰青天殃曰災又是一說脣征政典曰先時者殺無赦不及時者殺無赦謂夏后為政

之典籍有此何故專為厯象差舛設此嚴刑湯誓予則
拏戮汝固有攸赦拏戮非殺也父子兄弟罪不相及一
人從軍違令而收其男女如入于罪隸舂藁之類以辱
之湯一時之權而非經也歟武成釋箕子囚亦所謂赦
易雷雨作解君子以赦過宥罪周禮司刺掌三赦之法
又國君過市則刑人赦論語曰有罪不敢赦豈若後世
即位有赦謂之非次赦三年大禮有赦人主疾有赦天
災有赦赦既頻數奸猾僥倖管子書荀悅漢紀論詳矣

回一再改秦紀秦文公二十年初有三族之罪在春秋之前有嚴刑而無寬恩始此昭襄王二十六年書赦罪人遷之惟有此一赦始皇十二年秋復嫪毐舍人遷蜀者非赦也二十六年初并天下無赦終始皇之身未嘗有赦馬遷于水德後書曰于是急法久者不赦其慘如此以至于亡漢高之赦荀悅以為權時之宜亦漢有天下之一端諸葛孔明有言為政以大德不以小惠故匡衡吳漢不願為赦先帝亦言吾周旋陳元方鄭康成間

每見言理亂之道悉矣曾不論赦也若劉景升父子歲歲赦者何益于政事出常璩華陽國志其論甚善故詳書之

七月臧荼反九月虜荼

臧荼史漢無傳初韓廣王燕荼以燕將從項羽入關羽自立為西楚霸王徙韓廣王遼東以荼為燕王廣不肯徙國荼殺之韓信下趙代遣使諭荼歸漢漢有天下詔臧荼王如故至是反蓋項羽之舊人也項羽誅臨江嗣

王尉不降今荼又反得非有所疑乎韓信彭越之徒善用兵為楚王梁王不遣之誅荼而高祖自徃征之何也七月反九月虜自長安至燕甚遠除在道之日外蓋至則擒之也高祖用兵之神如此古吉行五十里師行三十里戰國以來古法盡廢但貴神速皆世變也

利幾反上自擊破之

利幾項羽將以陳令侯之潁川史記書為陳公上文使丞相噲將兵平代地則未嘗不以兵柄付大臣也不使

諸侯王擊之則恐其連衡乎豈諸將無能敵利幾者乎
高祖性喜躬臨行陣擊一潁川反侯何至勞萬乘之尊
以山壓卵擒之易耳而異日平城之悔萌于此矣

附論是年張耳吳芮皆薨

東萊大事記書曰越景王耳長沙文王芮皆薨引漢書
韓彭英盧吳傳贊曰昔高祖定天下功臣異姓而王者
八國張耳吳芮彭越黥布臧荼盧綰皆徼一時之權變
以詐力成功咸得裂土南面稱孤見疑强大懷不自安

事窮勢迫卒謀叛逆終于滅亡張耳以智自全至于亦失國惟吳芮之起不失正道故能傳號五世以無嗣絕慶流支庶有以夫著于甲令而稱忠也 紫陽方氏曰漢書所以可觀者諸侯王功臣恩澤外戚侯百官公卿七表書拜罷死絕帝紀不書不人人為之傳臧荼王而無傳有傳則拜罷死絕亦可攷不必帝紀又書也唐書繁蕪不足觀帝紀書大臣拜罷死絕何益不足道之人亦為傳何益漢書又不如史記班固而馬疎然馬有深

意高見也附評史法書此

後九月徙諸侯子關中

是年五月兵皆罷歸家諸侯子在關中者復之十二歲
其歸者半之至後九月仍徙諸侯子關中以減荼利幾
之反也

後九月

漢書帝紀元年冬十月之前書秦二世元年二年三年
於秦二年書後九月此漢五年又書後九月文穎曰即

閏九月也時律厯廢不知閏謂之後九月師古曰非也
若律厯廢則當徑謂之十月不應有後九月蓋秦律法
置閏總於歲末據漢書表及史記漢未改秦厯之前迄
至高后文帝屢書後九月是知故然非厯廢也 紫陽
方氏曰漢高元年乙未五年己亥秦二世二年癸巳癸
巳至己亥七年兩書後九月則是七年再閏與古五年
再閏之法異是必律法有差耳大德三年己亥三月十
七日回書云漢高五年己亥凡二十五己亥除一年不

算計一千五百年云

治長樂宮 咸陽 長安

東萊大事記書曰治長樂宮于長安史記紀不書漢書紀無于長安三字東萊解曰按史記大事記高帝六年更命咸陽曰長安然盧綰傳云綰封為長安侯長安故咸陽也時高祖雖西入關尚居櫟陽方營宮室于長安謀徙都也 紫陽方氏曰東萊讀書甚精如此項羽未死綰封長安侯五年後九月始王燕高祖雖從婁敬都

關中未都長安班固書西都長安非是

六年冬十月令天下縣邑城

東萊曰始皇墮壞城郭高帝令縣邑城心量廣狹世祚短長于是卜矣紫陽方氏曰縣令長皆秦官掌治其縣萬戶以上為令秩千石至六百石減萬戶為長秩五百石至三百石又列侯食縣曰國皇太后皇后公主所食曰邑有蠻夷曰道凡縣道國邑千五百八十七曰道曰國曰邑皆縣也地理志高祖訖孝平凡郡國一百三

縣邑千三百一十四道三十二侯國二百四十一郡統
縣國亦統縣書趙國至長沙國凡二十國而已廣平國
統縣十六長沙國統縣十三非高祖時大國也有一縣
之國則列侯之戶最少者有不能一縣者周制有采邑
即食邑論語有千乘之邑十室之邑伯氏駢邑皆食邑
莒父宰武城宰即後世之縣

十二月游雲夢執韓信

漢紀書六年十月又告楚王信謀反上問左右左右爭

欲擊之用陳平計乃偽游雲夢十二月會諸侯于陳楚

王信迎謁因執之史記紀書十二月人有上變事告楚

王信謀反

云

楚王信即因執之下文書是日大赦天

下史記淮陰侯列傳書漢五年正月徙齊王信為楚王

都下邳信初之國行縣邑陳兵出入漢六年人有上書

告楚王信反高帝以陳平計天子巡狩會諸侯南方有

雲夢發使告諸侯會陳吾將游雲夢實欲襲信信弗知

高祖且至楚信欲發兵反自度無軍欲謁上恐見禽或

說信斬鍾離昧謁上上必喜信持其首謁高祖于陳上

令武士縛信載後車信曰果若人言狡兔死走狗烹飛

鳥盡良弓藏敵國破謀臣亡

師古曰此黃石公三畧之言班書刪下四句信欲發

兵反刪

天下已定我固當烹

班書亦刪此八字

上曰人告公反

遂械繫信至洛陽赦信罪以為淮陰侯信知漢王畏惡

其能常稱病不朝從由此日怨望鞅鞅羞與絳灌等列

紫陽方氏曰詳觀史記此傳韓信初無反心告者過

也陳兵出入非反也匿鍾離昧何不請于上而求赦之

以故人之誼匿之亦未至于反也信引黃石公三畧之
法言缺曰天下既定我固當烹馬遷書曰信知漢王畏

惡其能盡之矣

遷書曰漢王班書用之

高祖既得信恐天下諸侯

實有謀反而未發竟者相挺而起即于擒信之日大赦
天下詔曰天下既安豪傑有功者封侯新立未能盡圖
其功身居軍九年或未習法令或以其過犯法大者死
刑吾甚憐之其赦天下此赦為擒韓信而下然高帝亦
心知信本無罪已有赦之之意故後十餘日至洛陽赦

信封為淮陰侯信居長安自六年十二月至十一年凡
閒居六年陳豨反呂后蕭何詐信斬之紫陽方氏曰
三代之王君臣未嘗有詐春秋戰國始尚詐而孫吳之
徒著兵書無非詐也漢高君臣上下皆詐也偽游雲夢
以召信高后詐令人從上所來以詐給信而信之用兵
亦皆詐耳陳餘欲殺張耳高祖以類耳者斬頭與之彼
殺一不辜而得天下不為者何如人哉陳平張良無非
以詐為事者下邳在東海郡有上邳下邳雲夢在南郡

華容縣南秦漢大兵之後具數澤尚可游獵乎以此為
名會諸侯于陳陳即孔子厄陳者今陳州馬遷謂假令
韓信學道謙讓不伐不矜其能庶幾周召太公然詐力
之士未足語此如曹參學黃老庶幾乎哉

甲申始剖符封功臣曹參等為通侯

本徹侯武帝諱徹改

東萊大事記曰甲申始剖符封大功臣二十餘人為通
侯用留侯世家語師古曰剖破也與其合符而分授之
也功臣表曰漢興二世自秦元年之秋楚陳之歲初以

沛公總率雄俊三年然後西滅秦立漢王之號五年冬
克項羽即皇帝位八載而天下乃定始論功而定封訖
十二年侯者百四十有三人

平陽懿侯曹參信武肅侯靳歙汝陰文侯夏侯嬰清
河定侯王吸陽陵景侯傅寬廣嚴侯召歐廣平敬侯
蘇歐博陽嚴侯陳濞堂邑安侯陳嬰曲逆獻侯陳平
右六年十二月甲申封者十一人

留文成侯張良

十六年薨

射陽侯劉繆

即項伯

鄼文終侯蕭

何鄩音贊

絳武侯周勃舞陽武侯樊噲曲周景侯酈商

頽陰懿侯灌嬰汾陰悼侯周昌梁鄒孝侯武虎成敬

侯董漂蓼夷侯孔叢

此人侯三十年

費侯陳賀陽夏侯陳稀

自為王
反誅

右正月丙午封者十三人

隆慮克侯周竈

正月丁未反

陽都敬侯丁復

正月戊申封

陽信

胡侯呂青

正月壬子封

東武貞侯郭蒙

正月戊午封

汁防肅侯

雍齒

五月戊午封
十或作什方侯

右正月丁未戊申壬子戊午封者五人三月以後
今不書留侯世家所謂六年上已封大功臣二十
餘人其餘日夜爭功不決未得行封于是有沙中
謀反之說先封上所憎雍齒共計二十九侯也位
次別攷班書帝紀此事載在封劉賈等四王之後
曰上已封大功臣三十餘人非是雍齒之侯第二
十九人耳焉得曰三十餘人功臣表正月戊午雍
齒封亦不當書三月

東萊大事記微差

至六年正月終

古今攷卷二十三

欽定四庫全書

古今攷卷二十四

元方回續

功臣剖符

皇帝璽符節前已攷矣功臣剖符猶未為詳漢高未定天下先封王韓王信英布等書曰剖符天下既定又封列侯剖符故書始曰剖符師古曰剖破也與其合符而分授之也自先王以來有五瑞五玉所謂桓圭信圭躬

圭殺璧蒲璧以合瑞五等諸侯來朝則執之去則還之
周禮天子執冒圭四寸以朝諸侯冒之云者契勛圭璧
無作偽者也禹會塗山執玉帛者萬國玉五玉也此制
既廢而秦有皇帝之符則郡守所剖而人主藏其半者
乎漢因之

附周禮八節

周禮掌節掌八節陳祥道云玉節以玉為之以命數為
大小守邦國者用玉節諸侯守其國者即與此節也又

在五玉之外角節用犀角守都鄙者用角節角節其制未聞虎節人節龍節皆以金為之而象其形使山國土國澤國者異其用持之為信門關用符節半竹為之都鄙用管節全竹為之道路用旌節其制修於符節管節飾以毛蘇武節旌盡落唐節度使建旌節又特侈大皆奉使所擁之物也又有貨賄用璽節即今之印章也

漢銅虎符竹使符

史記孝文本紀二年九月初與郡國守相為銅虎符竹

使符漢書文帝紀二年九月初與郡守為銅虎符竹使符比史記去國相二字紫陽方氏曰讀史漢文章班劣於馬讀注脚則漢書顏師古其尤也所以東萊大事記本文多取史記注脚多引師古而不取索隱此注應劭曰銅虎符第一至第五國家治兵遣使者至郡合符符合乃聽受之竹使符皆以竹箭五枚長五寸刻篆書第一至第五張晏曰符以代古之珪璋從簡易也師古曰與郡守為符者謂各分其半右留京師左以與之以上漢

書注史記同而添索隱曰漢舊儀銅虎符發兵長六寸
竹使符出入徵發說文云分符而合之小顏云右留京
師左與之古今注云銅虎符銀錯書之張晏云銅取其
同心也回謂張晏代古珪璋之言是也高祖封功臣王
侯所剖之符有云丹書鐵契別已攷

東萊論銅虎符

呂后之崩年齊王中尉給齊相召平曰王欲發兵非有
漢虎符驗也東萊曰文帝以前蓋有虎符矣此謂初作

者豈非用銅於此始乎 東萊又曰漢諸侯王兵權在相王不得自調發蓋相漢所置也若京師不下虎符則相亦不得自調發東萊又曰漢書止書郡守為銅虎符竹使符削國相二字紫陽方氏曰漢以符及節為信朱虛侯章附持節者車以入北軍則信之中有詐焉此齊王發兵不待虎符且并誘奪瑯琊王兵則亦難測也景帝七國反其發自以虎符為信大信結人心小信仗符節

孟子若合符節

孟子曰舜生於諸馮

云

得志行乎中國若合符節趙

岐注節玉節也周禮有八節

孫奭正義曰按周禮守邦國者用玉節守都鄙者用角
節凡邦國之使節山國用虎節土國用人節澤國用龍
節皆金也以英蕩輔之鄭注云以金為節鑄象焉必自
以其國所多者所以相別為信明也今漢有銅虎符杜
子春云蕩當為帑謂以函器盛此節或曰英蕩畫函門

關用符節貨賄用璽節道路用旌節注云符節如今宮中諸官詔符璽節者今之印章也旌節今使者所擁節是也將送者執此以送行者也

孟子朱文公集注符節以玉為之篆刻文字而中分之彼此各藏其半有故則左右相合以為信也紫陽方氏曰孟子所謂符節周禮八節中有之所謂半竹為之者其是乎周禮雖劉歆為之所本遠矣故孟子有此符節之言後世一切廢之當攷自何時始自有紙之後方板

竹策帛書曰符曰節曰傳一切皆廢部符下所屬紙也
自一命以上至極品有官誥曰綬紙也省劄紙也人臣
表章牋奏凡下達于上紙也人主制詔勅黃批答凡上
行於下紙也州縣百司行移紙也惟有印之一物匣之
袱之而不佩無所謂古之組綬矣唐有鐵券以賜功臣
有此碑本

英蕩

虎節人節龍節以英蕩輔之杜子春謂英蕩當作帑謂

以函器盛此節陳祥道謂禹貢揚州貢篠簜大射禮在建鼓之間則簞竹也詩曰二矛重英朱英綠縢英飾也節之函以竹為之而有飾焉先儒以為畫函是也紫陽方氏曰以器盛物謂之函今世有之英簞之制廢矣

傳

周禮司關凡所達貨賄者則以節傳出之鄭氏曰商或取貨於民間無璽節者至關為之璽節及傳出之其有璽節亦為之傳傳如今移所過文書漢制門關用傳兩

行書繒帛分持其一文帝十二年除之景帝四年又復之

繻

終軍入關關吏予軍繻張晏曰繻音須書帛裂而分之若券契蘇林曰繻帛邊也舊關出入皆以傳傳煩因裂帛頭合以為符信也師古曰蘇說是也軍問以此何為吏曰為復傳還當以合符軍曰大丈夫西游終不復傳還弃繻而去軍為謁者使行郡國建節東出關吏曰此

前弃繻生也

申以丹書之信

功臣表曰申以丹書之信漢紀末曰與功臣剖符作誓丹書鈇契金匱石室藏之宗廟如淳曰謂功臣表誓使山如礪河如帶國乃滅絕又曰金匱猶金滕也師古曰以金為匱以石為室重緘封之保慎之義今按高帝封爵之誓曰使黃河如帶泰山如屬國以永存爰及苗裔凡十七字紫陽方氏曰剖符作誓丹書鈇契無注恐是

以鐵鑄符如銅虎符以丹書此十七字於上而各剖一
半乎既以鐵為版丹書此誓剖之則以金為匱以石為
室而諸侯執左符所留右符皆藏之宗廟乎素問有金
匱玉版鼂錯策亦云剖之玉版藏之金匱尚書有金縢
古之文書懼其朽懼其焚欲垂久遠故謹嚴如此陳祥
道謂老子曰執左契以不責於人則右留京師者非是
今日賀太守啟劄必曰榮折左符久矣然高祖封功臣
有王侯之符郡守未有符也郡守銅竹符自漢文始應

劾曰國家欲使功臣傳祚無窮帶衣帶也厲砥厲石也
河當何時如衣帶山當何時如厲石言如帶厲國猶永
存以及後世之子孫也回謂陰陽消長寒暑往來有晝
則有夜有生即有死有興則有亡詩書所云萬壽萬年
人臣祝至尊萬歲即封爵永存之意也功臣表有云子
孫驕逸殞身亡國訖于孝武靡有孑遺又當以是觀之
重以白馬之盟

史記呂后本紀太后欲立諸呂為王問右丞相王陵王

陵曰高帝刑白馬盟曰非劉氏而王天下共擊之今王
呂氏非約也漢書見王陵傳帝紀無此事而史記無王
陵傳功臣表申以丹書之信重以白馬之盟師古曰白
馬之盟謂刑白馬而歃其血以為盟也歃色洽反所洽
反啜也紫陽方氏曰漢高刑白馬盟史漢帝紀不書
在王陵傳非劉氏而王乃見其事不知歲月周禮有司
盟之官有盟有詛荀卿與穀梁皆曰盟詛不及三王然
周有此官王府供珠盤以盛牛耳玉敦以盛血有桃有

芻以祛不祥封人飾大盟牛牲司寇蒞盟書登之天府
禮記曰蒞牲曰盟又曰周人作會而民始疑注會盟也
詩曰君子屢盟亂是用長春秋書盟不一書同盟者于
幽二馬陵戚虛打鷄澤戲重丘各一凡八也會盟于邾
者凡一也盟而不地者凡三也文二年三年十三年書會及盟而
不稱公者幽宿防齊翟泉晉處父蘓子之女累宋向戌
之劉各一凡八也孟子曰五霸桓公為盛葵立之會諸
侯束牲載書而不歃血凡牲飾以文繡其殺也寘之于

坎加書其上盤盛耳敦盛血尸之者執耳大者先軟小者亞之左哀十七年公會齊侯盟于蒙孟武伯執牛耳定八年晉侯盟衛侯衛人請執牛耳涉陀成何拔衛侯之手及腕史記毛遂取鷄狗馬之血來奉銅盤跪進楚王曰王當軟血而定從于殿上遂左手持盤右手招十九人軟堂下此長少先後之別也襄十一年左傳瑕禽曰平王東遷吾七姓從王王賜之辭旒之盟杜預言重盟不以雞犬王者賜而後用又左傳鄭伯使卒出玃行出

犬雞以詛射頴考叔者此盟詛大小之別也鄭玄曰大事曰盟小事曰詛襄十一年季武子作三軍盟諸僖閔詛諸五父之衢定五年六年陽虎盟桓子于稷門而又大詛盟三桓于周社盟國人于亳社又詛于五父之衢此盟與詛之例也子任割臂以盟莊公則不用牲華元子反登牀之盟不用牲春秋恥城下之盟尋盟同盟乞盟要盟逃盟渝盟必誓之于神如襄十一年亳之盟桓所謂名山名川羣神羣祀先王先公七姓十二國之

祖而誓之今世俗尚然有云發誓願者有云出惡語以
詛說者獨不用牲耳漢高祖刑白馬非劉氏而王者天
下共擊之則帝當先歃血而蕭曹之徒以次歃之歟史
記作噍血盟使接反又云或作啗又章牒反漢書作啖
血師古曰小歃也所甲反與蘇秦合六國從刑白馬盟
同視周人七姓駢莠之盟尤重矣桃今之桃樹枝葉萌
莢帚也

附攷白馬盟出處

史記惠景間諸侯年表太史公讀列侯至便侯曰有以也夫長沙王者著令甲稱其忠焉鄧展曰漢約非劉氏不王如芮王故著令使特王或曰以芮至忠故著令也璣曰漢以芮忠故特王之非制故特著令便侯音鞭吳芮也

漢書吳芮傳其定著令下亦引鄧展注師古曰傳後贊文或說是也

右非劉氏不王出處二

史記無長沙王世家亦無吳芮傳別攷詳矣附

此

正月丙午立劉賈等同姓四王

先是十二月執韓王信赦天下田肯賀上曰甚喜陛下得韓信又治秦中因論秦齊形勢謂齊地方二千里持戟百萬非親子弟莫可王齊者上曰善賜金五百斤

紫陽方氏曰田肯之賀有以發悟上心為大封同姓之始也異姓諸侯王表凡十八王項羽王西楚立十八王也羽誅齊王韓信徙楚尋廢為侯此一王無矣衡山王

吳芮徙王長沙已死子嗣此一王存臨江王尉虜此二
王無矣九江王英布此二王存常山王張耳改王趙已
死子敖嗣此三王存代王趙歇滅矣此三王無矣陳餘
亦滅矣齊臨淄濟北膠東三田王俱滅矣此六王無矣
三秦王滅矣此九王無矣燕王臧荼滅十王無矣而盧
綰王燕此四王存遼東王韓廣滅此十一王無矣魏王
豹虜十二王無矣殷王司馬卬降十三王無矣韓王成
項羽殺之立鄭昌漢立韓王信十四王無矣而漢存五

王河南王申陽降十五王無矣五王存之外有彭越王
梁當此時異姓之王有六人吳芮子張耳子不足慮韓
信已廢而英布彭越韓王信盧綰未可保也諸功臣未
盡封徹侯也田肯有以啟高祖之心始大封王子弟故
賞之金五百斤云

以故東陽郡鄣郡吳郡五十三縣立劉賈為荆王
功臣表曰賈高祖從父弟也荆燕吳傳荆王劉賈高帝
從父兄也不知其初起時文穎曰東陽今下邳也鄣郡

今丹陽也吳郡今會稽也韋昭曰鄣郡今故鄣縣也後
郡徙丹陽轉以為縣故謂之故鄣也師古曰鄣音章東
萊曰漢地理志下邳屬東海郡即秦剡郡既已封楚王
交當是秦漢之間分割下邳為東陽郡其詳不可攷也
鄣郡所治乃湖州長興縣故城在縣西南八十里今建
康地徽宣太平廣德皆鄣郡之境也吳郡所治乃平江
府今常秀杭越明台婺溫處衢潤湖睦皆吳郡之境也
紫陽方氏曰漢地理志會稽郡秦置高帝六年為荆

國十二年更名吳然六年正月丙午劉賈之封不曰會稽郡而曰吳郡何也宣班固追書而從改名耶秦置會稽郡漢統縣二十六治吳縣今平江府是也嚴助傳書會稽吳人朱買臣傳書吳人蓋皆今平江府人買臣武帝時拜會稽太守即今平江府人治吳縣之會稽非今浙東越州之會稽也劉賈傳立為荆王王淮東不治吳郡之吳縣漢志臨淮縣有東陽縣在淮浦盱眙淮陰縣之間必立於此賈五六年高祖十一年黥布反賈戰弗

勝走臨淮郡之富陵縣為所殺無子國除高祖十二年
十月以會稽吳封兄弟之子濞為吳王三郡五十三
城史記書曰郡吳治今平江府吳縣其傳謂豫章郡銅
山鑄錢韋昭注豫字誤但當言章郡今改章古字通用黟錯
削濞會稽郡則吳王所都亦取之矣故反反而滅三郡
入漢則吳郡之後為會稽郡其在此時歟丹陽郡統縣
十七皆今浙西江東地有故鄣縣即鄣郡有曰黟縣曰
歙縣回所居徽州今二縣古名猶存黟音伊今寫曰黟

會稽郡則浙西浙東地皆是朱買臣之負薪為郡皆浙
西吳地東陽所屬臨淮郡則淮東地皆賈荊王交楚王
所謂分楚地為二國也

以碭郡薛郡郟郡三十六縣立弟文信君交為楚
王

楚元王傳楚元王交字游高祖同父少弟也文穎曰碭
郡今梁國是也薛郡今魯國是也郟郡今東海是也傳
曰王薛郡東海彭城三十六縣東萊曰碭郡所治乃單

州碭山縣今應天興仁鄆濟單毫廣濟皆碭郡之境也
薛郡所治乃兗州仙源縣今兗海淮陽皆薛郡之境也
郟州所治乃海州東海縣秦分薛郡東海及旁郡地置
郟郡如沂州之費縣淮陽軍之下邳縣皆其境也 紫
陽方氏曰回嘗至今兗州州治無屋數碑立瓦礫中前
宋太守題名猶在居民無數十戶東望孔子墓林蔚
然豐茂泰山巍乎其土欲壓平楚而曠土荊棘罕積野
雉飛雝其卵可拾驟馬逐之三起三落即得雉矣元王

交少時嘗與魯穆生白生申公俱受詩於浮丘伯伯者
荀卿門人也一時間氣鍾於一門高祖之武元王之文
偉哉惜乎申公無詩元王詩今不傳也

高祖四兄弟

太上皇生高祖

長兄伯早卒

次兄仲

即代王喜

少弟交

字游即

郅客

文王禮

劉辟疆

劉德

劉向

元王

劉歆

夷王

王茂

從譚反

自殺

壬子以雲中鴈門代郡五十三縣立兄宜信侯喜

為代王

紫陽方氏曰宜信侯喜為代王即高祖兄仲也漢書無傳事見吳王濞傳中功臣表六年正月壬子立七年為匈奴所攻棄國自歸廢為郃陽侯孝惠二年薨子吳王濞高祖十二年十月辛丑以故代王子沛侯立為吳王立四十二年孝景三年反誅濞傳高帝兄仲之子也高帝立仲為代王匈奴攻代仲不能堅守棄國間行走洛陽天子不忍致法廢為郃陽侯子濞起為沛侯年二十從高祖破黥布荊王劉賈為布殺無後上患會稽吳

輕悍乃立潁為吳王

東萊曰雲中唐勝州單于大都護是也鴈門唐雲應朔
州是也代郡唐蔚州是也史記本紀載喜為代王十七
年漢興以來諸侯年表雖書喜元年于六年與漢書同
然謂韓王信降匈奴而喜繼王其地二者皆非也漢書
本紀年表載封拜年月日郡名縣數皆具蓋故府之所
藏也况喜所王者雲中鴈門代三郡信所王者太原一
郡自不相干史記之誤明矣然所以差誤者亦有說焉

高帝更以太原郡為韓國徙信以避胡都晉陽信上書
國被邊匈奴數入晉陽去塞遠請治馬邑上許之馬邑
據地理志屬代郡在高帝時或屬太原未可知也至高
帝十一年封文帝為代王頗取山南太原之地以益屬
代是割韓王信之故地以增益代國也自後世觀之韓
之都乃在代之縣代之地乃涉韓之舊疆也子長論興
地之大勢封建之大意固非孟堅所及至于總練故實
考核歲月則孟堅之所長也 紫陽方氏曰回嘗謂馬

疎而意有餘班密而見不足者此也

以膠東膠西臨淄濟北博陽城陽郡七十三縣立

子肥為齊王

東萊曰肥惠帝庶兄庶長子也膠東所治乃萊州即墨

縣膠西所治乃密州高密縣臨淄所治乃青州臨淄縣

濟北博陽所治未見項羽立田安為濟北王治博陽

今分為兩郡蓋在田榮并三齊之後城陽所治乃密州

莒縣今登萊沂密濰青淄濱滄

棟濟德博皆六郡之境也

紫陽方氏

曰田肯一言寤主謂非親子弟莫可王齊者蓋亦窺見高祖之心奪韓信齊而易之楚信未改封入壁奪其軍忌之甚矣既而不以齊封諸人以為郡不欲以重地與人也其擒信于陳奪其楚地信本不反忌之而欲除之也所謂楚亦未肯與人也田肯發其端惟以得信為賀而次言齊地宜封子弟高祖之疑于中者遂決詔曰齊古之建國也今為郡其復以為諸侯將軍劉賈數有大功及擇寬惠修潔者王齊荊地此詔甚典雖止言劉賈

疏屬一人羣大臣心知其指矣遂奏請劉賈王荆元王
交王楚分楚為二其曰正月丙午又七日壬子立代王
喜齊王肥先從姪次少弟次仲兄竄後親庶長子其實
雅意在立子肥為齊王也故又以曹參為齊相焉大封
同姓自此四王始漢表書楚第一代第二齊第三荆第
四高祖王子弟實十二人代王喜廢為侯子濞以劉賈
戰死之地封為王表惟書十一人史記漢興以來諸侯
表序甚佳表微不同如東萊之言取漢表

高祖封同姓王十二人除此四王外又八王

初四王荆王賈楚元王交代王喜齊悼惠王肥

淮南厲王長高帝子十一年十月庚午立孝文六年謀反廢死後立子劉安

趙隱王如意高帝子九年四月立十二年為呂太后所殺無後

代王高帝子漢文帝也諱恒十一年正月丙子立十七年高后八年入為皇帝

趙共王恢高帝子十一年三月丙午為梁王立十六年
高后七年徙趙其年自殺無後

趙幽王友高帝子十一年三月丙寅立為淮陽王二年
徙趙十四年高后七年自殺子遂文帝元年封景帝三
年反誅子辟疆文帝二年封河間王

燕靈王建高帝十二年二月甲午立十五年高后七年
薨殺其子

燕敬王澤高帝從祖昆弟高后七年以營陵侯立為瑯

瑯王二年文帝元年徙燕漢書荆燕吳傳劉賈劉澤劉
濞也澤最疎非高祖之封

吳王濞高祖孫代王喜之子也喜棄國赦為郃陽侯高
祖立為吳王立四十二年景帝二年反誅

紫陽方氏曰高弟八男惠文二帝高五王傳一齊三趙
一燕也淮南王長自為傳

史記秦漢之際月表

太史公讀秦漢之際曰初作難發於陳涉

句文奇

虐戾滅

秦自項氏

奇文

撥亂誅暴平定海內卒踐帝祚成於

漢家

此四句謂高祖文奇

五年之間號令三嬪

音善索隱曰古碑字帝戰反

自

生民以來未有受命若斯之亟也

此第一節言陳項劉三人之興文奇

昔

虞夏之興積善累功數十年德洽百姓攝行政事薦之

於天然後在位湯武之王乃由契后稷修仁行義十餘

世不期而會孟津八百諸侯猶以為未可其後乃放弑

上文總言湯武中舉孟津事正謂武王末放弑二字又兼言湯武古天體如此秦起襄公章於

文繆獻孝之後稍以蠶食六國百有餘載乃能并冠帶

之倫

三段論虞夏湯武秦

以德若彼

回曰此謂虞夏湯武

用力如此

回曰此謂秦索

隱証非是

蓋一統若斯之難也

此第二節言五代之興甚難

秦既稱帝患

兵革不休以有諸侯也於是無尺土之封墮壞名城銷

鋒鎬鉏豪傑維萬世之安然王跡之興起於閭巷合從

討伐軼於三代鄉秦之禁適足以資賢者為驅除難

耳

此第三節論秦之失

故憤發其所為天下雄

索隱曰指高帝王

回曰上文有則兼言劉項


安在無土不王此乃傳之所謂大聖乎豈

非天哉豈非天哉非大聖孰能當此受命而帝者乎

紫陽方氏日子長十表自我作古秦楚之際月表自
秦二世元年壬辰七月始其次第秦楚趙項齊漢燕魏
韓七月陳涉起九月兵至戲二年癸巳十二月陳涉死
九月項梁起八月武臣自立為趙王九月田儋王齊是
月漢王為沛公起是月韓廣王燕是月魏咎始二年六
月韓王成始其書簡而有法此二年癸巳有後九月
同三年甲午盡九月乙未十月為漢元年沛公破咸陽
子嬰降十一月項羽坑秦降卒於新安十二月羽至關

中誅子嬰正月為楚義帝元年項羽為天下主分十八
王義帝都江南郴羽為西楚霸王都彭城而楚分為四
吳芮衡山王都邾共敖臨江王都江陵九江王英布都
六趙更名常山張耳常山王都襄國分為代趙歇代王
都代齊更臨淄田都臨淄王都臨淄分為濟北田安濟
北王都博陽分為膠東田市膠東王都即墨此齊三
田也關中分為四漢王都南鄭章邯雍王都廢丘塞
王司馬欣都櫟陽翟王董翳都高奴燕王臧荼都薊

分為遼東王韓廣都無終魏更為西魏王魏豹都平陽
分為殷王司馬邛都朝歌韓王成都陽翟分為河南王
申陽都洛陽至漢五年一月止其一月或書曰端月通
項羽十九王虛尊義帝一帝



古今攷卷二十四